



Komunikadu Imprensa
Tribuná Judisiál Primeira Instáncia Dili
04 Marsu 2025

**Tribunál Judisiál Primeira Instáncia Dili kondena pena efetiva tinan rua
(2) ba arguidu krime maus-tratus ba kónjuje**

Iha 19 Feveireiru 2025, Juis Tribunál Judisiál Primeira Instáncia Dili prezide julgamentu leitura akordaun ba kazu krime maus-tratus ba kónjuje ne'ebé envolve arguidu NRF hasoru nia feen iha Munisípiu Dili. Tribunál kondena arguidu ho pena prizaun efetiva tinan rua (2) tanba provadu komete krime maus-tratus hasoru ninia kónjuje (feen).

“JSMP konsidera desizaun ne'e hanesan avansu ka progresu pozitivu ida ba prevene aktu krime sira ho natureza violénsia doméstika no bele sai hanesan lisaun ida ba arguidu no mós sosiedade atu hakotu korente aktu violénsia sira iha sosiedade tanba kada tinan númeru violénsia doméstika sae maka'as kompara ho aktu krime sira seluk”, dehan Sra. Ana Paula Marçal, Diretora Ezekutiva JSMP.

JSMP ekoraza juis sira seluk atu uza desizaun ne'e hanesan referénsia atu aplika iha kazu ho karakter no gravidade hanesan nune'e bele eduka arguidu, comunidade atu evita krime hanesan akontese iha sira nia família.

Kazu konkretu, Prokuradór akuza arguidu katak iha 02 Jullu 2021, iha oras tuku 18:00 lokraik, arguidu rakut ofendida nia ulun no liman. Antes ne'e, iha loron ne'ebé la apura maibé maizumenus iha Feveireiru 2021, arguidu tuku maka'as dala tolu (3) iha ofendida nia kabaas.

Prokuradór mós akuza katak iha tinan 2009 (oras, loron no fulan la apuradu), arguidu tuku dala ida (1) iha ofendida nia oin. Alende ne'e, maizumenus iha tinan 2018, ofendida foin alta no fila hosi ospital (HNGV) tanba moras, arguidu dudu halo monu ofendida no ofendida nia ulun baku ba parede. Agresaun hirak ne'e hotu rezulta moras iha kabaas no kotuk laran. Enkuantu ulun no liman, sofre kanek.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o 6 prizaun, konjuga ho artigu 2, 3(a), 35 (a) no 36 LKVD.

Iha prosesu julgamentu, arguidu konfesa faktu sira iha akuzasaun no deklarata katak arguidu ho ofendida la hela hamutuk ona dezde tinan 2021, ofendida hela iha uma-kost ho sira-nia oan na'in tolu (3).

Alende ne'e, ofendida mós kontinua konfirma faktu sira iha akuzasaun no hatutan katak arguidu laiha responsabilidade ba uma laran, arguidu mete joga mesin no deve ema nia osan. Osan deve hirak ne'e, ofendida mak ba buka osan hodi selu. Ofendida kontinua hatutan katak bainhira arguidu husu osan ba ofendida mak ofendida hatan *osan laiha*, arguidu lori dokumentu uma nian

ba peñor hodi foti ema nia osan. Liután, ofendida hateten arguidu la konsidera ofendida hanesan nia feen, halo tratamentu aat ba ofendida, hasai ofendida nia roupa hosi uma no duni sai ofendida hosi uma, nune'e ofendida ho nia oan sira ba hela iha uma-kost.

Testemuña NCF nu'udar arguidu ho ofendida nia oan feto deklarata katak nia sempre rona nia inan ho aman diskute malu. No iha loron ida, testemuña haree arguidu foti fatuk atu tuda ofendida maibé la konsege tanba testemuña ba hapara tiha arguidu nia aktu ne'e. Alende ne'e, testemuña mós depoimenta katak arguidu sempre fila uma kalan bo'ot tanba ba joga mesin no dala ruma ema mai hakilar iha uma husu sira nia osan ne'ebé mak arguidu deve halo testemuña ho nia alin sira ta'uk.

Testemuña hatutan katak dezde tinan 2021, arguidu ho ofendida hela ketak no ofendida mak selu testemuña ho nia alin sira nia eskola. Iha tinan 2024, arguidu serbisu iha Ministériu Komunikasaun mak fó osan ho valor US\$50 to'o US\$100 ba testemuña ho nia alin sira no tula sira ba pasiar no ba han.

Iha avaliasaun ba faktu sira, tribunál prova katak arguidu provadu durante moris hamutuk halo ofendida terus no sofre maka'as tanba arguidu baku bei-beik no insulta ofendida hanesan temi ona iha akuzasaun. Nune'e, tribunál konsidera katak faktu sira iha akuzasaun provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena efetiva prizaun tinan rua (2).

JSMP rekomenda ba autór judisiáriu sira atu uza mós referénsia konvensaun Internasionál sira ne'ebé iha relasaun ho kazu violénsia bazeia ba jéneru iha sira nia alegasaun nune'e bele haforsa liután desizaun tribunál nian.

Kazu ne'e rejista iha tribunál ho Nú. Prosesu: 0341/21. DICMR, julgamentu prezide hosi juisa Dra. Ana Paula Fonseca, representa juis kolektivu. Entretantu, Prokuradór representa hosi Dr. Luis Hernani Rangel da Cruz no arguidu hetan Defeza hosi Dr. João de Carvalho hosi Defensoria Públiku.

Atu hetan informasaun kompletu favor kontaktu:

Ana Paula Marçal
Diretóra Ezekutiva JSMP
Diresaun e-mail: casimiro@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl